

Bosna i Hercegovina
- Federacija Bosne i Hercegovine -
TUZLANSKI KANTON
Skupština
Broj: 02-02-726-6/10
Tuzla, 23.12.2010.g.

Na osnovu člana 86. Poslovnika Skupštine Tuzlanskog kantona – prečišćeni tekst ("Službene novine Tuzlanskog kantona", br. 10/04, 13/06 i 1/08), Služba Skupštine Tuzlanskog kantona, d a j e

Z A P I S N I K
SA DRUGE SJEDNICE SKUPŠTINE TUZLANSKOG KANTONA-HITNOG KARAKTERA
ODRŽANE 23.12.2010. GODINE SA POČETKOM U 12,40 SATI

Sjednicu je otvorio i njome predsjedavao predsjednik Skupštine Tuzlanskog kantona Bajazit Jašarević.

Predsjednik Skupštine je konstatovao da sjednici prisustvuje 33 poslanika, te da ga je poslanik Mijo Krešić obavijestio o spriječenosti prisustva današnjoj sjednici.

Predsjednik Skupštine Bajazit Jašarević je u svoje ime i u ime zamjenika predsjednika Skupštine zahvalio na ukazanom povjerenju, a poslaniku Seadu Čauševiću je čestitao na uspješnom vođenju prve sjednice Skupštine.

Prešlo se na utvrđivanje dnevnog reda.

Predsjednik Skupštine je predložio slijedeći

D n e v n i r e d:

1. Razmatranje prijedloga i donošenje Izmjena i dopuna Budžeta Tuzlanskog kantona za 2010. godinu

2. Razmatranje prijedloga i donošenje Odluke o privremenom finansiranju Tuzlanskog kantona za period 1.1. – 31.3.2011. godine

3. Razmatranje prijedloga i donošenje Odluke o davanju saglasnosti na Odluku o privremenom finansiranju iz obaveznog zdravstvenog osiguranja u Tuzlanskom kantonu za period 1.1. – 31.3.2011. godine

4. Razmatranje prijedloga i donošenje Odluke o neposrednom učešću osiguranih lica u troškovima korištenja pojedinih vidova zdravstvene zaštite u osnovnom paketu zdravstvenih prava na teritoriju Tuzlanskog kantona

5. Davanje mišljenja na:

a) Odluku o izmjenama i dopunama Programa utroška sredstava za novčane podrške u primarnoj poljoprivrednoj proizvodnji utvrđenih Budžetom Tuzlanskog kantona za 2010. godinu

b) Program raspodjele sredstava za organizacije i udruženja sa pozicije „Tekući grantovi“ za 2010. godinu

c) Odluku o izmjenama Programa raspodjele sredstava za materijalno zbrinjavanje lica u stanju socijalne potrebe za 2010. godinu

Skupština Kantona je jednoglasno usvojila predloženi dnevni red.

Tok sjednice:

1. U okviru prve tačke dnevnog reda razmatran je prijedlog Izmjena i dopuna Budžeta Tuzlanskog kantona za 2010. godinu.

Na navedene izmjene i dopune Budžeta dostavljeni su amandmani Vlade Kantona.

Ministar finansija *Sead Bećirović* je u uvodnom izlaganju istakao da su Izmjene i dopune Budžeta Tuzlanskog kantona za 2010. godinu urađene u cilju usklađivanja rashoda sa raspoloživim prihodima, kao i obezbjeđenja dodatnih sredstava za naknade za topli obrok u iznosu od 7,00 KM do kraja godine i regres u iznosu od 400,00 KM za 2010. godinu, obzirom da je u Budžetu planiran topli obrok po 5,00 KM a regres po 200,00 KM u skladu sa raspoloživim sredstvima i na osnovu pregovora sa sindikatima s ciljem da nivo plaće ostane isti kao i u 2009. godini. U odnosu na podnesene amandmane dao je pojašnjenje amandmana XXXV u vezi izmjena u razdjelu 10 glava 02 u pogledu finansiranja političkih stranaka, parlamentarnih grupa, koalicija i neovisnih poslanika, gdje se potkrala tehnička greška u navođenju iznosa za nove političke stranke, te da za finansiranje HDZ BiH na potrošačkom mjestu 0008 treba da stoji iznos od 6.732,00 KM a za SBB – Fahrudin Radončić iznos 10.890,00 KM.

Otvorena je rasprava u kojoj su učestvovali poslanici: *Senahid Šaković, Besim Imamović, Salih Šabović, Mersed Šerifović, Senad Alić, Dževad Hadžić, ministar finansija Sead Bećirović i poslanik Mirsad Selimović.*

Predsjednik Skupštine je zaključio raspravu i predložio da poslanici koji su u okviru rasprave iznijeli amandmane iste usaglase sa predstavnicima Vlade. Takođe je predložio da ministar finansija sačini zaključak koji bi Skupština uputila Vladi Federacije.

Predsjednik Skupštine je dao pauzu u 13,45 sati radi usaglašavanja amandmana.

(14,15)

Nakon pauze, ministar finansija *Sead Bećirović* je konstatovao da su podnesena dva amandmana na prijedlog Izmjena i dopuna Budžeta Tuzlanskog kantona za 2010. godinu, i to:

Amandman poslanika Saliha Šabovića kojim je predloženo da se u rebalansu stavka za sport poveća na 950.000,00 KM i

Amandman poslanika Besima Imamovića kojim je predloženo da se u razdjelu 11 glava 01 potrošačko mjesto 0023 Kapitalni tranferi nižim nivoima vlasti ostavi iznos 1.800.000,00 KM kako je i planirano Budžetom za 2010. godinu.

Vlada Kantona navedene amandmane nije prihvatila.

Predsjednik Skupštine je konstatovao da je poslanik Salih Šabović zatražio izjašnjenje o podnesenom amandmanu.

O predloženom amandmanu je glasalo 6 poslanika „za“, 2 poslanika su bila „protiv“ i 22 poslanika su se „uzdržala“ od glasanja, čime je amandman odbijen.

Poslanik *Besim Imamović* je iznio da od amandmana može odustati uz adekvatno obrazloženje Vlade, odnosno kako je Vlada došla do iznosa od 800.000,00 KM?

Obzirom da poslanik nije dobio obrazloženje, prešlo na izjašnjavanje o amandmanu.

O predloženom amandmanu je glasalo 5 poslanika „za“, 3 poslanika su bila „protiv“ i 22 poslanika su se „uzdržala“ od glasanja, čime je amandman odbijen.

Nakon izjašnjavanja o amandmanima, predsjednik Skupštine je dao na izjašnjavanje prvi zaključak Kluba poslanika SDP-a koji glasi:

Skupština Tuzlanskog kantona zadužuje Vladu Tuzlanskog kantona da zaustavi sve prijeme u radni odnos u tehničkom mandatu i da poništi sve u međuvremenu raspisane konkurse za prijem

u radni odnos, a da Javne ustanove prijeme svedu na one prijeme koji su nužni po programu rada tih ustanova za 2010. godinu.

O navedenom zaključku otvorena je rasprava u kojoj su učestvovali poslanici: *Besim Imamović, Ivo Divković, Mersed Šerifović, Fahrudin Skopljak, Zoran Jovanović i ministar finansija Sead Bećirović.*

Predsjednik Skupštine je zaključio raspravu i konstatovao da je Klub poslanika SDP-a predložio dva zaključka, a da je treći zaključak precizirao ministar finansija.

Nakon iznesenog dao je na izjašnjanje prijedlog prvog zaključka Kluba poslanika SDP-a.

Skupština Kantona je jednoglasno (sa 32 poslanika "za") donijela navedeni zaključak.

Prešlo se na izjašnjanje o drugom zaključku Kluba poslanika SDP-a koji glasi:

Skupština Tuzlanskog kantona traži od Vlade Tuzlanskog kantona da do naredne sjednice Skupštine pripremi i dostavi Skupštini Informaciju o zapošljavanju u institucije Vlade i ministarstava u zadnjih šest mjeseci, uz naznaku gdje je prijem obavljen i po čijem zahtjevu.

Skupština Kantona je sa 29 glasova „za“, bez ijednog glasa „protiv“ i 3 „uzdržana“ glasa donijela navedeni zaključak.

Prešlo se na izjašnjanje o trećem zaključku:

Skupština Tuzlanskog kantona traži od Vlade Federacije Bosne i Hercegovine da u što kraćem roku donese Odluku o raspoređivanju, odnosno odobravanju sredstava Tuzlanskom kantonu u iznosu od 26 miliona KM iz sredstava tranše Stand by aranžmana sa MMF-om, s obzirom da je Tuzlanski kanton, usvajanjem Izmjena i dopuna Budžeta TK za 2010. godinu, ispunio uslove po preporukama Federalnog ministarstva finansija.

Skupština Kantona je jednoglasno (sa 32 glasa „za“) donijela navedeni zaključak.

Predsjednik Skupštine je konstatovao da će uz navedeni zaključak Ministarstvo finansija pripremiti dokumentaciju koja će se kao prilog dostaviti Vladi Federacije, predsjedniku i podpredsjednicima Federacije.

Potom je dao na izjašnjanje prijedlog Izmjena i dopuna Budžeta Tuzlanskog kantona za 2010. godinu uz amandmane Vlade Kantona.

Skupština Kantona je jednoglasno (sa 32 glasa "za") usvojila prijedlog i donijela Izmjene i dopune Budžeta Tuzlanskog kantona za 2010. godinu, čiji su sastavni dio amandmani Vlade Kantona.

2. U okviru druge tačke razmatran je prijedlog Odluke o privremenom finansiranju Tuzlanskog kantona za period 1.1. – 31.3.2011. godine.

S obzirom da nije bilo uvodnog izlaganja niti rasprave, predsjednik Skupštine je dao na izjašnjanje prijedlog Odluke o privremenom finansiranju TK.

Skupština Kantona je jednoglasno (sa 29 glasova "za") usvojila prijedlog i donijela Odluku o privremenom finansiranju Tuzlanskog kantona za period 1.1. – 31.3.2011. godine.

3. U okviru treće tačke dnevnog reda razmatran je prijedlog Odluke o davanju saglasnosti na Odluku o privremenom finansiranju iz obaveznog zdravstvenog osiguranja u Tuzlanskom kantonu za period 1.1. – 31.3.2011. godine.

S obzirom da nije bilo uvodnog izlaganja niti rasprave, predsjednik Skupštine je dao na izjašnjavanje prijedlog Odluke.

Skupština Kantona je jednoglasno (sa 29 glasova "za") usvojila prijedlog i donijela Odluku o davanju saglasnosti na Odluku o privremenom finansiranju iz obaveznog zdravstvenog osiguranja u Tuzlanskom kantonu za period 1.1. – 31.3.2011. godine.

4. U okviru četvrte tačke dnevnog reda razmatran je prijedlog Odluke o neposrednom učešću osiguranih lica u troškovima korištenja pojedinih vidova zdravstvene zaštite u osnovnom paketu zdravstvenih prava na teritoriju Tuzlanskog kantona.

Ministar zdravstva *Asim Musić* je podnio uvodno izlaganje.

Otvorena je rasprava u kojoj su učestvovali poslanici: *Zlatko Šimić, Hajrudin Bećirović, Redžiba Šiljić–Sagdati, Mahir Nurkanović i Samir Kamenjaković*, koji su u ime svojih klubova iznijeli da su protiv predložene odluke i predlažu da se primjenjuje i dalje Odluka o neposrednom učešću osiguranih lica u troškovima korištenja zdravstvene zaštite na teritoriji TK („Službene novine Tuzlanskog kantona“ br. 2/03) koja je još uvijek na snazi.

Potom je direktorica Zavoda zdravstvenog osiguranja *Šehzada Salihbašić* dala dodatna pojašnjenja.

Ministar zdravstva *Asim Musić* je iznio da se o prijedlogu odluke Skupština mora izjasniti, ukoliko ista ne dobije većinu, na snazi će i dalje biti stara odluka.

Potom se Skupštini obratio i predsjednik JOB-a *Faruk Šahović*.

Predsjednik Skupštine je zaključio raspravu i dao na izjašnjavanje prijedlog Odluke, *te je konstatovao da za prijedlog nije glasao niti jedan poslanik „za“, 27 glasova je bilo "protiv" i 3 su se "uzdržala" od glasanja, čime je prijedlog Odluke odbijen.*

5. Prešlo se na petu tačku dnevnog reda davanje mišljenja na:

a) Odluku o izmjenama i dopunama Programa utroška sredstava za novčane podrške u primarnoj poljoprivrednoj proizvodnji utvrđenih Budžetom Tuzlanskog kantona za 2010. godinu

b) Program raspodjele sredstava za organizacije i udruženja sa pozicije „Tekući grantovi“ za 2010. godinu

c) Odluku o izmjenama Programa raspodjele sredstava za materijalno zbrinjavanje lica u stanju socijalne potrebe za 2010. godinu

a) Ministar poljoprivrede, šumarstva i vodoprivrede *Amir Hasić* je u uvodnom izlaganju istakao da mišljenja na programe o raspodjeli sredstava na osnovu Zakona o izvršenju Budžeta TK daje nadležna Komisija, a obzirom da ista nije formirana, Kolegij Skupštine je zaključio da isto daje Skupština TK. Potom je dao obrazloženje Odluke o izmjenama i dopunama Programa utroška sredstava za novčane podrške u primarnoj poljoprivrednoj proizvodnji utvrđenih Budžetom Tuzlanskog kantona za 2010. godinu, navodeći da je razlog donošenja odluke umanjeње sredstava po usvojenom rebalansu.

Poslanik *Mersed Šerifović* je iznio da ministar nije dao adekvatno obrazloženje za pristupanje izmjenama Programa, jer je do izmjena Programa došlo zbog neutroška sredstava na pojedinim pozicijama i potrebe za preraspodjelom sredstava na druge pozicije.

Predsjednik Skupštine je zaključio raspravu i dao na izjašnjavanje sljedeći zaključak:

Skupština Tuzlanskog kantona prihvata Odluku o izmjenama i dopunama Programa utroška sredstava za novčane podrške u primarnoj poljoprivrednoj proizvodnji utvrđenih Budžetom Tuzlanskog kantona za 2010. godinu.

Skupština Kantona je sa 26 glasova "za", bez ijednog glasa "protiv" i 2 "uzdržana" glasa donijela navedeni zaključak.

b) Potom se prešlo na razmatranje Programa raspodjele sredstava za organizacije i udruženja sa pozicije „Tekući grantovi“ za 2010. godinu.

S obzirom da nije bilo uvodnog izlaganja niti rasprave, predsjednik je dao na izjašnjanje sljedeći zaključak:

Skupština Kantona prihvata Program raspodjele sredstava za organizacije i udruženja sa pozicije „Tekući grantovi“ za 2010. godinu.

Skupština Kantona je jednoglasno (sa 30 glasova "za") prihvatila navedeni zaključak.

c) U okviru podtačke c) razmatran je prijedlog Odluke o izmjenama Programa raspodjele sredstava za materijalno zbrinjavanje lica u stanju socijalne potrebe za 2010. godinu.

S obzirom da nije bilo uvodnog izlaganja niti rasprave, predsjednik je dao na izjašnjanje sljedeći zaključak:

Skupština Kantona prihvata Odluku o izmjenama Programa raspodjele sredstava za materijalno zbrinjavanje lica u stanju socijalne potrebe za 2010. godinu.

Skupština Kantona je sa 19 glasova "za", bez ijednog glasa "protiv" i 13 "uzdržanih" donijela navedeni zaključak.

Predsjednik Skupštine je u ime Skupštine TK i u svoje ime čestitao katolički Božić, Novu godinu i pravoslavni Božić.

Sjednica je završena u 15,30 sati.

Sekretar Skupštine

Ahmet Smajović